

復齋先生龍圖陳公文集

復齋先生龍圖陳公文集卷第二十三

行狀

朝散大夫直秘閣主管亳州明道官林公行狀公諱行知字子大姓林氏世為閩家史謀相望公之九世祖居福州之長樂縣祖太中公徙居福清宣和中以舍選升肯學行稱一時實生簡肅公簡肅登紹興壬戌進士第清風直節赫然為乾道淳熙名臣逮事三朝八歷帥守豐功碩德具載國史最為孝宗所知位至兵部侍郎官三品公其中子也生於紹興十九年胚胎積慶幼而重遲孝弟大得加以嚴父

是師及多識前輩名公鉅人問學孜孜無子弟之好  
儒生貧士有所不及乾道淳熙兩舉禮部不中一意  
為古人為己之學 紹興改元始以簡肅公恩授京  
秩監湖州德清縣戶部牒賞庫一洗宿蠹能聲方軒  
未幾丁簡肅艱執喪盡禮倚廬終制四年反吉辛公  
棄疾時帥福唐以鹽局屈公公力辭不就五年時宰  
以名聞于上上曰此朕舊學林栗之子也特差幹辦  
湖北營田司公事江陵細民仰食魚湖之利往時府  
與民爭民益困後常獨以予民更數十年矣時帥復  
攘之公曰瀕湖細民極不聊生粒食之時絕少朝暮

所餐不過蓮藕菱芡魚蝦蛤蚌而已近年盜賊稀少  
歲歉而不至於饑者未必非川澤弛禁之效也今塞  
其衣食之路收其生養之具彼於風濤押習一旦失  
業不去而為盜者幾希退入䟽十可疑之說以沮之  
帥不樂反書曰十不足疑帥又使軍將代酒官軍  
士代酒人以省費公曰是耕不以奴織不以婢也非  
徒無益酒課抑又有害軍政帥急於儲蓄遇商賈如  
束濕有以藥弭賤物抵重罪者公為貸其深文諫其  
歛怨除其遲卒搜捕之授帥卒從之民旅驩抃其究  
心職業剛毅不屈如此官滿白于時宰曰湖北義勇

一路十五郡除辰沅靖條溪免洞團結外十二郡為義勇者凡七萬六千人而江陵府則一萬五千有奇董之帥臣立之將校縣令不得而預務農閱武之外繇役不及焉今則權歸諸縣事出總首教閱之事置之不講徒為縣司承符總首報怨而已加以誅求科擾貽害一路今日養兵之費率數戶而後可給一兵今不費衣廩而有六七萬之衆不過農隙閱習一月小有費耗耳可不務乎又曰營田紹興三四年間王四廂帥湖北與置營田莊之在山口鎮者六十有二聯比為一屯百兵八千餘人初年所獲已有二十四萬

之績以今所入較之僅及初年十分之一往年葉丞相以都承旨帥湖北日罷兵籍而易為民耕根括營田得其要領以被召中輟僅脩葉都承已行之蹟取於豪民優其客戶簡租蠲役以其課入充義勇閱習之資顧不偉歟又言一路所管五十六縣內七縣令佐具員十六縣丞簿並不置自餘諸縣自兵火後管無丞簿而有監酒稅一員謂宜罷酒官之闕增置主簿以兼丞於經費無損于民事有益慶元二年主管南外睦宗院有旨命宰執侍從兩省臺諫各舉所知一二人兵部尚書劉公德秀以公名應詔嘉泰改

元上宣諭宰執世固有不求聞達之士卿宜以名聞  
參政何公澹以公文學議論能世其家而靖退有守  
用充其選公初未之識謝啟云有殊張師德之數及  
門幾類唐子方之不識而召赴都堂審察以三劄上  
中書其一曰夫金虜女真一小醜耳當國家全盛之  
際所憂者在遼夏豈知有所謂女真者羊驅豕突汗  
蠟中華逾六紀矣自古夷狄之盛有若此者物無常  
盛之理有盛則有衰金虜前日之盛固所以為今日  
之衰也然自辛巳之役國家無太兵革亦三十年于  
此矣物無終靜之理有靜則有動今日之靜所以基

異日之動也虜方削弱試不能為吾患萬有一中原  
豪傑於起其地或有竊吾位號籍吾聲勢而撼吾邊  
圉吾得安坐而不動乎此之可憂始非女真比孟子  
曰國家閑暇及是時明其政刑雖大國必畏之矣蓋  
言安平之不足恃而自治之策不可以閑暇而遂廢  
也欲望留意戎脩毋以虜之衰弱而隳吾自治之規  
模其二曰今世士大夫相習為欺安然行之而不以  
為愧者無若薦舉之曉然易見也 祖宗之時留意  
人才憂國之臣如范忠宣在熙寧間則乞詔內外達  
官各學所知司馬文正公在元祐日則乞詔侍從以



上各舉十科其他因事舉官時時有之比其上聞悉  
闕臺省一有繆舉衆議籍然鐫族免官不以貴廢是  
以職業脩人才出欲望廟堂特賜敷奏駮發德音戒  
厲薦舉之官尚或繆舉為欺則當坐以罔上違制之  
罪其三曰乞令保正當役無拘管民戶願募衆人充  
代者聽一切免追正身保長催科其逃亡戶絕申官  
根刷勿令代納皆急務也得旨與二令差遣二年三  
月除太社令三年三月轉對論泉舶香網之弊與諸  
州流刑之濫其年郊禋先廟於麗正門習肆赦儀而  
臺網久弛從者擁闕朝士冠幘墮失都城轉以為笑

公貽書臺諫謂集百官班名曰習儀而使此曾得以  
亂之將來郊祀禮畢赴端試殿稱賀又赴麗正門外  
立班肆赦百官皆合乘騎更夜昏黑人馬壅併性命  
有不可保也乞行約束多置燎燭建<sup>植</sup>極如宮殿之  
禁以絕喧閤又上宰相書曰竊見車駕齊宿青城百  
官諸軍奉職危從都人士女傾城出觀最是火盜關  
係利害乞行下所屬嚴切隄備不管疎虞百官吏人  
並合守局尋<sup>帝</sup>抹火不過以急遣軍兵等併力前去地  
頭揀援為上策豈知軍兵一出填塞街巷束手坐視  
弊端實多夫火之始燃撲滅及時特數夫之力耳失

不蚤治其勢方張炎炎不絕必用餘除撤屋宇乃能  
斷絕火路捨此更無長策然軍兵於大家巨室則議  
價於朝廷有司則望喝賜公謂宜先與分定四隅  
差撥官吏軍兵又廂界各分地方稍有警急責在本  
地分時即措置撲除滅與免罪外厚加犒賞餘處  
軍兵不許妄動各行提脩皆曲突徙薪之先見也四  
月除將作監簿四年八月進丞大理寺有偽造諸弊  
者連繫百餘人公盡心詳讞有孫其姓者以與鄰人  
同姓名為吏所捕箠掠百端獄將具公視其人無懼  
容問之無懼詞公曰此必非其罪也密使人訪真囚

得之一寺大驚服公之明而仁也都城災 聖天子  
震懼詔百官條陳闕失公上疏其畧曰漢志有之火  
南方揚光輝為明者也王曰嚮明而治故堯舜舉羣  
賢而命之相遠四佞而放諸桀貧佞分別官人有序帥  
由舊章敬重功勲則火得其性若乃信道不篤或耀  
虛偽譏夫昌邪勝正則火失其性 祖宗成憲不  
可輕變令以一人之言從而改更者有之矣銓曹之  
定法不可踰越也今以一人之過從而破壞者有之  
矣貪墨敗官之人不可復用也今敢於自陳為之改  
正矣大官美職不可輕授也今寅緣馳騫可以謁致

而力取矣橫恩濫賞不可以妄予也今志於必得幾  
於執左券以取償矣皆切直之論也十月以親老力  
丐外補差知漳州開禧三年六月到郡濱海諸縣不  
免鬻鹽以裨歲計公曰諺所謂擔水賣河徒擾而已  
立罷之以從民便屈三月令行禁止民方得喜賢侯  
天奪其母民哭送輓車迨百十里如喪其親戚然公  
既歸民相與上其治狀於諸臺嘉定三年服闋朝  
廷謂漳人之愛公也復差知漳州陞辭上疏曰臣聞  
聖人之於天下必能使天下之人爭趨於名而後天  
下可為也人如爭趨於名則皆有自重之心凡寡廉

凡寡廉鮮恥之事且不肯為況敗名而犯分乎隆  
古盛時雖鄉黨之匹夫閭閻之賤隸皆知自好士寧  
饑餓不能出戶門而不敢喪名寧厄窮老死以終其  
身而不敢敗名教化興行風俗粹美豈無自而然也  
比歲以來權臣當國惡聞正直之語養成諛佞之風  
是以膺重任者甘於負國居方面者忍於從逆廉恥  
斷喪禮儀消亡天啓  
淵衷誅鋤元惡嘉興海內  
一洗而新之四年於茲矣然觀近日風俗猶似未能  
丕變凡已仕者與未仕者率無意於聲名往往以錐  
刀動其心貲產蠱其志金可攫市人有不暇顧食可

奪兄臂亦從而紛播紳謀身之計重於謀國學校區  
利之念甚於圖名詎可不求其故哉人亦孰無利欲  
之心也聖人為能移天下趨利之心而使之趨於名  
趨於利則背公而營私趨於名則輕利而重義二者  
治忽之所由分其端甚微而其究有不可勝言者矣  
然非空言巧說可得轉移之也操名教以範俗然後  
天下知德義之可尊崇名節以厲世然後天下知好  
惡之所在謹名器以立極然後天下知爵祿之可貴  
定名分以办物然後下不得以偏上核名實以計治  
然後偽不得以亂真若乃聖賢之學廢而理義不明

忠直之氣沮而是非不察仕進之塗窮而能否無別  
侈靡之習滋而貴賤亡等以此而望治安猶抱薪以  
救焚揚湯而心沸也豈可得哉皆採時病之藥石也  
晉為司農丞兩浙饋餉滯留蠹弊百出公轉對上疏  
曰臣聞孟子曰無政事則財用不足臣竊聞綱運  
之弊敢昧死陳之在法軍諸州受納苗米並起當年  
十月福建盡次年正月江浙湖廣盡次年二月十五  
日每月具元額已納見欠名數次申戶部立法之意  
蓋以入戶十月以前割穫二月以後就耕於農隙收  
歛之時限以輸納則不勞而事集若二三月以往皆



農務方興之際四五月以後又青黃未接之交官於此時賑糶賑濟以贈給之猶有艱食之慮豈宜此時重擾之乎今也受納之月官吏懈弛不加之意或故阻抑以逞已私洎至農事之興青黃未接百般追擾良可嗟嘆無補公家徒資囊橐此可謂之政事乎諸州軍起發綱運合於春水泛漲之時銜尾而下蓋受納者限既畢裝發上供及時離岸則有條而不紊亂若至六七八月河流淺澁暴風間作綱運以之留滯兵稍因而侵盜勢所必至亦難闕防今也受納之時恬不為意裝發之際束手無策乃於六七八月旋行

措置零碎起解文移旁午上下相蒙此可謂之政事  
乎兩浙綱運地里既近不該賞格見任官避免不肯  
坐押州縣零碎起解第令斗子船人認數率是結顧  
有過犯無藉船戶訟途盜難靡所不至部押綱官有  
勢力者既已避免所差指使及薄尉之無援者裝綱  
之後勒遣交卸或先押一綱未交復以後綱併委卸  
納從初不曾十預何緣可以關防欠折紛然弊僥百  
出此可謂之政事乎公可謂究心於職業者也是時  
朝廷患楮弊不行以新易舊公被選將命循行江  
浙七州始至嘉禾守臣未測公意公移文不報公取

黃榜望闕拜而揭宣詔亭郡人環觀乃招官吏諭所  
以來之意曰朝廷本欲便民非擾民也詔郡察之賢  
者得戶曹趙希彊以委之旁郡皆遣人闕伺公區處  
有方不為威福民間帖然所至皆不動聲色而事舉  
四旬乞事盡謝饋遺人以為得王人體是行因以求  
官吏賢否得無錫公鄭之悌等十人焉密薦於朝七  
月丐外補差知永州道改提舉湖南常平茶鹽入境  
有溪峒鎮將于再蓐等詐縣官差峒丁頭首充保正  
者峒丁買者地薄產縣官勒充保正追呼累年官兵  
會合擒捕抵敵不出公謂徭人既係世襲不應差役

豈宜勒充省民保正遂出官錢買回省地按罷邑宰以安峒民新化峒民有奉宗政者恃強犯法累年拒追公移文許以自新既至供述頗類知書公送石鼓書院且授一經以消其暴戾之氣繼而校官以為頗悔前非悉還虜掠公乃善遣歸峒及公移節長沙奉氏父子儒服拜送道傍感泣而去七年正月差提點湖南刑獄永州鞠易氏殺趙氏姑獄成將坐以極刑公遣幹官審問叅攷案牘乃大不然道姑者趙監獄之女易氏者監獄之妻也道姑久病死易氏索將寵嬌恣僣屋主人以私隙惡之妄訟易氏實殺道姑驗視

無致死之由獄吏文致易氏減道姑之食以致餓死  
比放屏去人服用飲食以故殺傷人者以鬪殺傷論  
法聞奏不聚問不讀示公於是疏可疑者十大不可  
者四以聞示朝差官別鞠盡非本情官吏避失入之  
罪百計沮撓公尋改持漕節移獄漕臺詰責守倖抗  
疏自刻繼而寬恩貸命易氏只從編置得不死寶公  
平及之力六月差轉運判官江右峒寇鄧啞九嘯聚  
披猖湖廣接壤為之騷動茶陵桂陽義兵越境赴敵  
公慮其擅興生事已戒之矣或報游騎往來本境樞  
師安公丙既遣戒隄備復發飛虎軍五百人越境夾

攻公謂寇在鄰境既有防兵未宜輕信以起事釁安  
公卒從公言寇果不入境民情帖然湖南官楮尚未  
流通朝廷以公嘗究其本末且奉使諭旨於江浙矣  
於是以一道稱提之寄委公公不迫不弛因其風俗  
而行且曰愛民體國自是一事今世士大人岌而二  
之體國當不失愛民民不之愛何以為邦本計郡民  
欺騙者多矣取賞物錢不滿百合而為千用中半取  
贖主家稍加詰難即與大訟公戒自今質庫以見錢  
典當者以見錢取贖以會子典當者以會子取贖以錢  
會中半典當者以錢會中半取贖令下民皆歡然時

與師司牒示不同有以兩司意嚮牴牾白于朝者劉  
下兩司協議使號令歸一乃行至星沙大師衛公  
涇以公施行為當銜回申朝省全州有客官為邸  
主不禮欲陷之罪以釋私忿遂純用會以償僦金邸  
主不從乃訟之官州司估籍其家以違制論欲從徒  
刑公攬郡牘撫案嘆曰新會所以便民朝廷之意豈  
若尔耶亟奏于上以為細民賃居非交關之地陷之  
重辟恐遠方疑畏騙挾肆行朝旨從其請給還家  
私而免其罪衡山丞挾新令以擾民則按之綏寧宰  
出文牒以駭眾則罷之諸邑或妄行追擾或計產敷

財公力加禁戢黜倚法為姦之吏斷敢騙告奸之民  
又遍劄諸郡司縣誨求便民之策孜孜不怠又措置  
卓鋪有方新會之頒湘民按堵無意外之恐者皆公  
之賜初楮弊之議興監司郡縣唯知以苛刻為能流  
籍之罪日報議者多歸罪民族之慢今未有敢明目  
張膽為廟堂言其本原之失在上而不在下也公上  
書深言其失在於不信謂吾夫子嘗告子貢以兵可  
去食可去信不可去楮券尺寸之紙所費纔六七文  
而以之為千金人恃以為用者非恃尺寸之紙也恃  
朝廷命令以為信耳 阜陵之始造會子也出內府



錢三百萬開會子務六所書之弊則曰就某處兌換收工墨直二十文此信足以行其權名足以副其實也今無務之可開無錢之可兌亦無藉之可銷猶之可也知出而不知收多其始而而顧其後乃至上供則諸司之索于州郡曰以錢若銀無以楮為也郡索之縣縣索之民亦曰以錢若銀無以楮為也用於下而不行於上散於民而不歛於官吾之信能不致疑而吾之權不既窮矣乎曩歲指揮自今年正月並作七十七文行用未幾而改之矣夫人必自信而復人信之必自重而後人重之朝令夕改無感乎人之見

疑而楮券之不能行也繼自今議論未定勿使聞于  
外廣詢博議議定而行又上 廟堂書民至愚而神  
不可以虛辭令也國於天地有與立焉其惟信乎竊  
怪夫今楮券之行人不能必信而皆有疑心焉疑者  
何一則曰十三界會子合至癸酉三月收換今乃不  
待期至而遽易能無疑於此乎一則曰曩歲固嘗作  
七百七十文行使矣未幾而聽從民便今雖一新觀  
聽寧保其往能無疑於此乎一則曰民間行用例有  
兩界若遇換易常存其一同時併換是致紛紛今十  
四界十五界並云己卯歲換易彼時又恐如今日之

紛紛也能無疑於此乎一則曰每界會子三年一換  
否則旋展今以己卯八年之久而券紙輕薄於舊曾  
未數月漸已漫滅能無疑於此乎一則舊會尚多新  
券無幾旋行印造墨猶未乾三月之限亦既不遠能  
無疑於此乎一則曰官券以一而易一民券則以二  
而易一損上益下似不如此能無疑於此乎一則曰  
券猶楮耳換易已艱收兌見錢何由可得能無疑於  
此乎一則曰鹽鈔之法屢改度牒之價輒變偽造之  
券奪真官吏之欺滋甚能無疑於此乎紛紛之說始  
未知其所終也伏維廟堂深思熟計審其事而亟圖

之守之以堅持之以久毋使復失信於天下宗社幸甚正其根本拯其流末故奉使將指所至民便安之八年七月召除度支郎中控免九月除直秘閣知廣州廣南東路經略安撫公復婁伸歸田之請上恩弗俞行至臨漳歸興益動悉遣吏卒即涂中上疏丐祠慕夫荷轡以歸上不能獨差主管冲佑觀仍力辭寓中秘恩上不得已辭之十二年三月除職予祠十四年四月差主管亳州明道官公天性剛正慈仁溫恭孝友其學以識實為本自羈貫或童以至強仕之年無非居嚴父師之側為儒生舉子業名未

登於仕版博學多聞謹身厲行於古今之變事物之  
理靡不窮格而周知其稟也厚其積也深其習也熟  
其鬱也久故一出從宦聲實交暢有非初筮淺學者  
所可企望王公貴人聞其議論多所薦拔事上官遇  
事敢言必極於是而後已立朝凡所見議皆知幾微  
獎確然不可易之論持身廉介蓋得親傳初為湖北  
幹官俸外以例得者市牛百餘以供營田之用將漕  
湖南也節用為富別儲銅鐵十萬緡以備緩急先是  
簡肅公帥湖南四年民懷其惠公不數年繼之遍歷  
諸臺者亦三年攝帥三月民喜如見父母 簡肅惠

政悉舉行之父子相繼覽南北之衝六里<sup>百</sup>民旅便之  
至於靑草之館梁栢江之渡不獨在湖南時為然  
鄉居亦為龍首石橋以濟涉所居郡城之東山粗有  
泉石公日讀書其間觴詠自誤不知世間復有可慕  
之事可玩之物也家居非歲朔不謁臺府時官非有  
舊不見口未嘗及私事鄉閭利病則公言之其著有  
史評通鑑綱條奏議文集藏於家公娶鄭氏西塘先  
生介公俠之曾孫女先公十七年卒封宜人男二人  
長致誠迪功郎新贛州贛縣東村次致廣迪功郎監  
潭州永豐倉女三人長適直承郎鎮南軍節度推官

洪搏再適宣教郎大理評事任永年少卿先生文薦  
之孫次適通直郎新知汀州長汀縣黃普藥山莊定  
公祖舜之孫次適從政郎監行在戶部瞻軍犒賞東  
酒庫鄭揚祖端明簡節公丙之孫孫二人某於公為  
中表兄弟辱公知為深去歲之冬嘗往拜焉見其容  
貌益強退而喜曰公其壽考未艾也今年五月十三  
日忽聞不疾而逝為之驚慟公年四十始仕垂三十  
年積階至朝散大夫直秘閣居家燕適者又六年平  
生靖退晚年不失顯榮世之年少疾趨者顧不能及  
年開八喪死於牖下五福具備一疋莫指公乎其又

奚憾其子致誠致廣以書來曰將以九月二十五日  
塋于福清縣拱辰山之原其為我述先人之行以求  
銘於當世名公某不得辭

奉直大夫福建路安撫司參議陳公行述

公諱寔字師是興化軍莆田縣人丞相魏國正獻公  
長嫡子也妣聶氏封魏國夫人公生而端重學問不  
煩父師紹興三十一年正獻遇明堂恩授承務郎  
監潭州南嶽廟是時正獻繇御史登法從駿駿秉政  
公在侍側未嘗有子弟之過賓客人士無識其面者  
遠絕請托毫髮不敢言乾道元年幹办福建路市舶



司公事舶司琛賁之府象犀香珠雜他奇藥捆載三  
積臨視者往往魚獵其尤又有所謂和買名予其直  
十不二三公曰彼冒萬死一生以求利吾忍奪之視  
其人如傷屏從者於門外如冠以故蠻商蜚客每遇  
公之至環立羅拜以手加額郡將侍制汪公大猷舶  
使張公堅深器重之淳熙二年迁主管南外睦宗院  
清源大郡姦究所集惡少無賴挾宗室之勢以陵駕  
平民民不敢求直公白宗正趙公不敵嚴為陪涉之  
禁以脫其爪距親以義理之言委曲諷諭以平其心  
未幾帖然民受不知之賜居多七年迁通判泉州州

有軍屯率歲糴船粟以哺官員其直以鉅萬計商人  
患之舟不時至軍情怏怏公下車移書屬邑定其輕  
賦革姦吏脅迫侵漁之弊誠信不欺皆感悅承命迄  
償所負往時商人取直於官視賂為先後公按籍為  
次莫不躍喜拊叫郡有富商蓋嘗德公因姻戚餽奇  
貨為謝且以自結公愕然曰子禍我矣其人愧謝而  
去語聞郡侯林公析謂僚屬曰是能世其家法者嘆  
息久之丁正獻憂愛號毀瘠反吉迨十六年通刺福  
州林公復帥三山知公清謹事無巨細悉與評論繼  
帥辛公弃疾馭下如束濕僚吏抑首唯諾趨公獨盡

誠不疑事有不可必辯止之氣和聲亮即反加敬侍  
同僚有侵公職者公遜不與校帥知之益服公量暇  
日與公商論古今應答如響皆出入經史百家故幸  
公薦公其章有博極群書見謂遠器之語終更造朝  
拜提舉福建路市舶入覲天顏甚懌迎謂曰卿名  
相之子所奏謹名器振紀綱銅錢出海二劄皆欣然  
開納慶元二年也未上魏國夫人薨虛喪盡禮服闋  
改提舉廣南路市舶公無意入南開禧改元上日既  
及逗留未行會有言者授主管建寧府武夷山冲佑  
觀公喜曰此吾志也蓋平生家食之日甚富率五鼓

秉燭觀書夜分乃寢暇則娛情花竹與老農圃相爾  
汝於阡陌間人不知其為素官者于時權臣妄興邊  
釁羽書旁午一日郡侯今侍郎王公居安招置坐席  
公言某事必不然未幾果然王公擊節嘆其遠識有  
詩遺公曰是非舉世誰能辨議論到公今始平通國  
皆稱為佛子知心無愧是純誠蓋謂此也嘉定二年  
轉福建路帥司參議官侍郎黃公庭尚書葉公時皆  
敬之每與議喜愠不形於色而所守確不可移師嘗  
曰陳君可謂仁者之勇四年自三山歸年將至欲致  
其事會弟將作監守卒於臨安之精舍益無意於人

世傷戚之餘鬱鬱不樂然未嘗疾也五年正月八日  
忽微眩家人視之已端坐而逝先是夢中獻公使人  
召已覺而遍省先隴謁親舊若將辭別之為者人皆  
駭之閭巷無少長莫不為之齋咨嘆息有泣下者公  
慈厚恭敬出於天性孝親友弟人無間言平居聞朝  
廷有大震憂喜不趨如出於已撫宗族惟恐不至遇  
人不以智愚高下一敬以和急人之貧施予不計有  
無期於傾盡自少至老未嘗有所怨惡親戚鄉黨僕  
使童稚無一於公有後言者戊辰秋鄉閭若早公齋  
板禱於天朝服徒行與父老偕已而綢雲勃興甘雨

大作猶不執蓋沾體而歸闔郡異之嗚呼可謂有志  
於斯人矣公弱冠入仕至是五十年所歷才五官非  
有廢退擯摠而甘心閑散曾不得一障乘之以行其  
志其所薦引皆當世名公如尚書王公大寶則稱其  
廉勤有守該瞻能文故相趙公汝愚則稱其端謹自  
將尉為令器知樞黃公洽鄭公僑皆嘗剡薦公卒靖  
退恐為人所知中更權臣用事使之不以道進者志  
得氣滿郡訕而聚笑之間謂至掘而有至幸者存當  
是時不墜先訓不為門戶羞今茲得戶牖下非幸歟  
享年七十積階由承務郎十四迂為奉直大夫封莆

田縣開國男邑食三百戶錫服金紫配方氏累封恭人先公二十年卒合葬焉子男三人曰廔通直郎知潮州海陽縣曰址承事郎監泉州南安縣鹽稅早世曰熟承務郎僉書惠州軍事判官廳公事女四人長適故通直郎知臨安府錢塘縣趙善綽次適從政郎前梅州軍事推官李摺次適文林郎前監行在太平惠民和劑局林致祥次適奉議郎知泉州南安縣方阜周孫男五人曰瑜曰瑑皆將仕郎曰珙曰珙曰璇孫女二人長適承務郎黃荃次未行將以十二月二十四日丙申附于正獻公之墓其孤廔走書安溪曰

庶先人與世鮮交又庶卑且賤不能求言於當代名公巨人遠日將止叔父其為我述所嘗聞者俾異日有所考某哭而書之以竢立言君子銘焉

蜀郡夫人贈東平郡夫人黃氏行狀

夫人諱德純字和卿姓黃氏南劍州沙縣人父頤德德不仕輕財樂施鄉黨稱焉紹興丁丑劍建間群寇竊發處士挈家避難山谷時夫人母鄧氏有娠一夕將曉夜光如雷發衾袂中已而夫人生六月十四日也岐嶷穎悟端重寡言父母鍾愛之少長動循禮法喜觀書一見袁氏世範曰美哉律身齊家待人接物



盡在是矣自是成誦而服行之終身處士為夫人擇  
配凡十餘年得前知密院今資政殿太學士金紫  
光祿大夫提舉臨安府洞賓宮鄭公昭先於丁未榜  
下曰此吾佳婿也知院太資公初任建寧府浦城簿  
楂源洞寇剽掠披猖太資公躍馬請行督捕時居民  
奔逸里巷一空縣官家人各謀竄身所詣夫人請偕  
行夫人不可曰民既驚潰我輩又復遁去邑誰與守  
我從夫效王官亦猶吾夫奉君命佐斯邑脫有大  
變死生以之義不當去請者慙赧而退寇亦迄不至  
屈無何大資俸檄之鄰邑有遠方書餽至夫人却之

不納閱月大資公返受書則朋友之問也或謂夫人拒之無迺已甚乎夫人曰婦人烏可與閨間外事況在官乎萬一私賄乘間入吾室他日有不可追之悔矣聞者皆曰夫人女丈夫也大質在政府八年勞悴感恙力上丐退之章夫人贊焉上不得已昇以名藩顯職用華其歸袞褱輿翮出都門觀者如堵咸謂大資勇退非內助無以成其志云大資昆季二人伯氏蚤亡女幼孤夫人撫其女而嫁之如已女養其子而教之如已子人無間言家居之明年長子逢辰蒙恩改授主管西外睦宗院夫人每語

聖

上念吾夫婦老死汝便於養故有是命汝當日夜思所以報稱者居官惟以公正為先其子奉命惟謹甲申夏水暴至漂沒廬舍所居之外浩為平湖垣墻頽圯之聲相屬夫人謀之大資曰吾居且如此鄰家卑下為患可知急聞廊廡以納之浮筏以濟其涉為粥以療其饑維廩以粟鄉人德之蓋夫人自大資官都時俸入既優每遇旱饑輒捐私囊以賑羸病如刼廣惠院五十間買田歲收數千斛以給之全活者以百計行之至今其利猶博此素志也秋閏八月寧廟遺詔下夫人哀摧亟命婢妾去華飾服縞素哭累日

卧病逾時諸子衣不解帶拜醫問藥靡神不舉夫人神氣無異常時且誦古詩云老建春寒秋後熱半夜殘燈天曉月又曰死生晝夜耳無過憂戚疾革區置家事曲盡經畫凡衣宸飯含之屬俾陳而視之戒勿以金珠寶玉殮祝子姪以勸學問相友愛正左右勿哭曰無撓我方寸迺正襟肅容而逝時寶慶元年三月六日也享年六十有九由孺人封宜人由齊安麗夫人九進封至蜀郡夫人中間河南郡蜀郡皆再封繇請不易地懼滿盈也每拜封輒愧謝迂延累月而後受及恤典下贈東平郡夫人子男三人逢辰朝散

郎西外睦宗院逢原宣義郎逢年承奉郎女一人先  
夫人七十卒適承奉郎行國子正王伯大夫人生積  
善之門稟資既異加以修飭好禮在家孝於父母事  
夫順而正儉而恭在官內言不出於閤外言不入於  
耳有求通家者必拒止之求裏言諛謝絕之當寵恩  
懼處榮知退雞鳴傲戒鴈鳩均一小星逮下之德人  
皆誦焉雖天性所得亦由知書然也在閨閤而挺然  
有烈操既貴脩然有林下風歲時承鄭氏祭祀洞洞  
屬屬必躬必親有核邊豆必豐必潔訓諸子以嚴束  
撫婦以慈輯宗族侍媵妾莫不有恩死之日哭者必

哀盡焉初處士有妾將生子惧主母怒欲不舉夫人  
時尚幼急走告父母曰妾雖賤所產者<sup>吾</sup>父母之子也  
疾趨以極之絕口不自言其事而鄰人則稱之不容  
口他日大資問之至于再三終不肯言若夫人可謂  
賢矣諸子卜明年六月朔日葬于連江縣鳳凰山之  
源大資公以諸子書薦某狀夫人之行自惟鄙陋既  
忝姻末義不得辭輒直書其事以俟立言君子銘焉

魏國太夫人聶氏行述

先妣夫人姓聶氏其先自建鄴徙居泉州晉江縣遂  
為泉州著姓曾祖威故任脩武郎祖崇故任成忠郎

父裕累贈武顯大夫自高曾以來皆以善人長者稱于州里至武顯公尤好施喜儒所與遊多一時名勝母宜人劉氏生三男四女夫人其長也幼而穎悟事親至孝武顯公與劉夫人深愛之常曰此兒喜愠不形言笑不妄他日福艾未易量也武顯公性明嚴諸子過有輒終日不憚或加以笞朴惟夫人從旁出一語即色定意解及笄歸于先公先公家素貧有女弟未嫁夫人即盡斥奩中裝略無靳色事姑冀國夫人時其飲食寒溫先意承志冀國寢疾躬自煮藥藥必先嘗冀國薨夫人哀毀特甚奉几筵如事生治家不

嚴而整隨事巨細處之皆有先繩度公得以盡心朝廷而不恤其私者夫人內助之力也夫人亦謙順每事必咨稟而後行諸子自幼至長飲食衣服常不使有餘曰吾非吝此但欲汝曹稍識辛苦庶異日可以保家耳且天地間物若虛費耗必有天譴吾見親戚間以縱侈敗者多矣汝曹戒之族屬孤貧者夫人必曲意拊卹先公未為侍從時俸祿所餘無幾夫人銖積寸累自隆興初元至今凡嫁內外族女三十五人羣襦織悉皆夫人親為經畫族中待夫人而炊者數十人鄰里有匱急至捐簪珥解衣推食周之惟恐不



及又喜為藥餌以濟病者嘗自都城歸方暑行嶮峽山路有一兵忽墜于崖谷夫人亟命左右多方救援遂獲全活素有知人之鑒先公或見賓客夫人多是屏間聽其議論退而能談其人賢否若虞忠肅公史文惠公方為館職學官今觀文殿大學士左相余公方改官注縣令今資政殿大學士元樞鄭公方舉進士大夫皆以公輔期之聞林簡肅公之賢欲妻以女弟有鄉人通判廣州者亟請婚舅家既許之矣夫人適見之曰此人若時果將熟必不能久未兩月夫人之言果驗竟以歸簡肅公先公每迂官夫人率豫夢

神人以告常從容言爵祿不宜太盛恐致災疾先公  
忻然曰是吾心也故年六十四即累疏請老紹熙四  
年守迎侍夫人官龍溪夫人每戒以勤於治郡少宴  
集又言州縣財賦分毫皆取諸百姓惟樽節用度庶  
可以寬民力每見治獄訟若有所矜貸則喜溢顏開  
慶元四年守奉安之興臨川閱歲夫人念歸以五年  
夏還里日南至子孫奉觴慶壽八十夫人舉酒甚懽  
初夫人幼年有疣如豆生腦間至是忽瘡為疽守亟  
丐歸侍養上恩賜可六年秋夫人疾忽加進醫治  
禱祠竟不痊愈病革召諸子孫人人訓飭之先公嘗

欲官伯父之孫垓會薨不果夫人顧謂守曰汝其成  
先志又歷記族中貧女未適人者悉加周助仍命立  
義莊以贍族人以九月二十五日薨于正寢享年八  
十有一夫人天性端靜誠實不欺言行有常外和內  
剛家君常夙興以待旦盛服危坐終日未嘗見其墮  
容每念國恩深厚常勉諸子竭忠以報撫愛庶子  
不異已生其待兄弟諸妹恩意猶篤外家繇夫人得  
官者八人紹熙五年守該遇聖主飛龍當遣親族奉  
表詣闕稱賀以夫人命奏次舅氏之子溥夫人自  
奉甚約所衣不過絺紵一衣閱數十年不敝從先公

起艱難位宰輔其服用豐約皆有常度未嘗少變先公累殿方面所至供張幕帟之屬夫人常戒家人愛護及去郡之日語先公呼主吏視元籍盡付公帑嘗有老兵誤留一紗慚夫人立命歸之先公每私宴未嘗燃官燭夫人常舉以勵子孫其謹身若節自少至老如一日子孫仕於四方夫人必戒以職務之暇無廢學潔已奉公無墜家聲寔等所至獲免吏議悉繇慈訓洪恩未報大禍奄至永懷願復昊天罔極恨不獲即從夫人于九原夫人自先公登朝由安人四遷為淑人先公執政迂永喜同安郡夫人入相遷和國

福國夫人拜少保進益國夫人加雍國唐國夫人拜  
少傅少師及兩遇郊祀夫人皆當進封則深以滿盈  
為戒再三抑而不奏凡辭避大國者又四焉以寔等  
累遇大禮四封益國太夫人該慶壽登極恩又兩封  
雍國太夫人慶元六年明堂迂魏國太夫人五子  
長曰寔朝請大夫新提舉福建路市舶次曰守奉直  
大夫新提舉荆湖南路常平茶鹽公事次曰定承事  
郎早卒次曰密奉議郎新主管南外睦宗院次曰宣  
宣教郎四女長適進士黃有次適秘書省著作郎鄭  
鑑再適端明殿學士簽書樞密院事羅點次適朝奉

郎通判福州梁億皆先卒次適迪功郎新福州古田  
縣主簿龔日孜孫男六人曰厘承奉郎監臨安府樓  
店務曰址承事郎監泉州南安縣鹽稅先卒曰塾承  
務郎曰坦宣義郎曰圭承務郎曰增承務郎孫女七  
人長適文林郎新知汀州武平縣趙善綽次適迪功  
郎建寧府甌寧縣尉李楷次適迪功郎新隆興府南  
昌縣主簿鄭燭次適迪功郎新監行在太平惠民和  
劑局林致祥餘在室曾孫男曰嚶曰珽皆將仕郎曾  
孫女四人尚幼日月有期將以六月六日甲申遷夫  
人榷于龍沒山妙寂院以嘉泰二年六月十二日甲

申祔于正獻公之塋諸孤相與追記夫人行實請銘  
于當世立言之君子以傳不朽嘉泰元年四月癸未  
孤哀子寔等泣血謹述

復齋先生龍圖陳公文集卷二十三終

復齋先生龍圖陳公文集拾遺

仰止堂規約

密家有堂乃文公朱先生淳熙間來訪先正獻公所  
寓之館也揭仰止之名以寓高山景行之敬與友人  
潘謙之講誦其間潘文游朱先生之門而有得者也  
間有好脩之士旬一集共講四書本文公之說而綢  
繆發明之如是者十餘人潘謂人之為學固不可以  
不博尤不可以不約顏子曰夫子博我以文約我以  
禮博而不約可乎遂取聖賢格言為訓又以呂氏鄉  
約緊括繼其後凡存心養性之道律已治人之方條



目具列終身所行不出於此密告之曰學基於少成  
於壯自壯至老皆行所得於少時者也孔門之徒所  
以獨稱賢子為好學者蓋顏子自其少時固已從事  
於博文約禮之間致力於克己復禮之際博文約禮  
所以求其約也克己復禮所以踐其約也夫然後一  
旦深造於卓爾之域諸友後生志銳正當可畏之年  
苟泛泛然溺心於文字言語之末而徒以博文獵涉  
為務不知擇其所謂明白簡要者遵守而力行之則  
將有童而習之白首莫得其原之弊矣况敢望顏氏  
子之卓哉密過時而學者也故深加懲創共述此以

諭諸同志云寶慶丁亥季秋六日書

辨志

人之為人必先辨志毫釐之差千里之異儒有二途  
小人君子學有兩端為人為己君子喻義小人喻利  
為己者誠為人者偽輕利重義物我一視拔偽存誠  
隱顯一致凡我同心請加審諦遠此二關方是小慙

致和

人心有知在致其極理本無形惟物是格物無精粗  
各有其則近而脩身遠而家國大而天地微而草木  
往古來今循環代續心之所感喜怒欣戚身之所接

臭味聲色一家之內父子主僕一國之中刑政禮樂  
天高地厚渾淪磅礴動植生成萬飛魚躍考諸往古  
治亂因革揆厥來今變通酬酢一理弗明不免漏落  
一義弗精立見乖錯所以窮理貴乎該博所以臨事  
貴乎審度方其用功一一累積及既會融一乃貫百  
孰謂格物惟務扞格孰謂慮事不必滅悉凡我同志  
要當深識毋貪近切一蹴至域

### 正心

仁義禮智天錫至善根諸吾心盜背睥面寬裕溫柔  
剛毅奮發齊莊中正文理密察惻隱羞惡辭遜是非

火然泉達其端甚微仁戒姑息義防憤激禮勝則離  
智毋詭譎致樂治中心心和樂致禮治躬外貌儼恪  
直而必溫寬而必栗剛而無靈簡而無傲和順積中  
英華發外清明在躬志氣如神

### 脩身

人之一身百體皆具苟失其則易置冠屨耳目無加  
手足無措儀容順正筋骸乃固頭容要直項頸中峙  
視必聚精聽必傾耳色欲粹回聲從喉起口如守瓶  
鼻如嗅馨回顧垂領脊挺肩平手效抱鼓足毋箕踞  
立微罄折坐若泥塑堂上接武堂下布武周旋中規

折旋中矩以此律身外邪敢侮體胖心正貌肅神凝  
為學則固答理必精克勤小物大德以成凡我同志  
勿怠勿輕

### 處事

欲正其義不當謀利欲明其道不必計功人無遠慮  
必有近憂徒見小利難成大事小善必為勿謂無益  
小過必改勿謂無傷事務則立不豫則廢時至則行  
未至勿遠臨事不敏易至失機處事欲速必有不達  
疑而勿詢猶正牆面謀而無斷作舍道傍

又

仕止久速和任清忠各當其可以集大成富貴貧賤  
患難夷狄素位而行無不自得橫逆之來反已自脩  
人非我是甄凡虛舟威武所加孰不震休自反而縮  
雖死弗屈

仰止書堂鄉約

德行相規

謹行信言入孝出弟確守廉隅廣施恩惠聞義必徙  
有過必更遵人為善矜不人能己長勿誇人短勿毀  
取友必端毋交非類

事業相勉

精玩詩書博覽史冊射御書數間以琴瑟教飭子弟  
勤課耕織嚴供祭祀禮賓客待洒掃門庭葺理廬室早  
蚤納官租期限勿失

### 過失相規

行不恭遜言不忠挾持勢恃才黨邪抑正背義營私棄  
禮殉俗用度不節鄙吝齷齪鬪訟生事妄作行  
險邀僥求投獻請託

### 禮俗相接

節朔往來慶弔餽遺患難相賙輕財重義會聚相齒  
勿問官職貧不貴財老不効力耕則遜隣行則遜路

為人息爭與眾集事

右件同約之人各自進脩互相規勸主約一人直月一人每月會集之人直月抗聲讀一遍仍推說其意遇眾所當舉之事直月為之糾集而程督之有善者眾推之書于集有過者直月糾之甚者聽其出約

以上載翰墨大全

### 硯銘

質而文厲而溫中有妙用者存

### 論語通釋題叙

先生合文公集注集義或問三書而通釋之蓋集注



之辭簡而嚴學者未能遽曉於是作或問一書設為問答以盡其詳且明去取諸家之意先生恐學者不暇旁究故直取疏解集注之辭而列之於後以便觀覽然集注或問間有去取之不同發揮之未盡先生追憶向日親炙之語附以己意名曰通釋於是始無遺憾矣嗚呼文公年七十一自弱冠至于易簣未嘗一日不用其力於此書先生弱冠從文公遊者三十餘年未嘗不執經在左右其去取之論無不與聞先生年亦七十從事是書亦五十年晚歲得閑歸三山生徒雲集誦論餘暇率夜坐至四鼓未晨而興手釋

二十篇比成而逝其用心堅苦如此學者其可以易觀哉

與李 求勉齋祠記書

古之有道德以教國子者歿則祭于瞽宗而鄉之以經行顯者亦祀之皆所以尊先賢厲後學也勉齋先生登文公之門纔弱冠立志苦學聞道最深宦遊所至學者宗而仰之晚歲歸休講道蕭寺樞衣受業遠近翕然天不憖遺梁木興嘆學徒追慕愈久彌篤今即其講道著書之地曰嘉福寺之後築屋肖像以寓仰瞻以嚴崇奉及門之士與夫知尊信者爭捐金買

田以為春秋享祀費祠成釋菜朔望胥會各以所疑更相質難期刑于教紀其事不於子乎之而何之復齋先生龍圖陳公文集附錄

### 宋史列傳

陳密字師復丞相俊卿之子少嘗及登朱熹之門器異之長從黃幹游以父任歷泉州南安鹽稅主管南外睦宗院再主管西外知安溪縣嘉定七年入監進奏院時無敢慷慨盡言者密上封時言宮中宴飲或至無節非時賜予為數浩穰一人蔬食而嬪御不廢擊先邊事方毀而椿積反資於妄用此言聞儀刑有

未正也大臣所用非親即故執政擇易制之人臺諫  
用慎默之士都司樞掾無非親暱貪利靡不得志庶  
士動招怨尤此朝廷權柄有所分也鈔鹽變易楮弊  
秤提安邊所創立固執已見動失人心敢軍之將躡  
躋殿巖庸鄙之夫久尹京兆宿將有守城之功以小  
過而貶三牙無汗馬之勞托公勤而擢此政令刑賞  
多所舛逆也若能交飭內外一正紀綱且不兩臣請  
伏面諷之罪奏入丞相史彌遠不樂而宗宮慶壽三  
牙獻遺至是為之罷郡尋遷軍器監簿九年轉對言  
人主之德貴乎明大臣之心貴乎公臺諫之言貴乎

直陛下臨政雖勤而治功未舉奉身雖儉而財用未  
豐愛民雖仁而實惠未偏良由上下相蒙務為欺罔  
風奏囊封有懷畢吐陛下付近臣差擇是有意於行  
其言也而有司惟取專攻上躬與移咨牧守之章騰  
播中外以荅觀德今赤地千里蝗飛蔽天如此其可  
畏猶或諱晦以早不為災蝗不害其稼他誣罔抑又  
可知臣故曰人主之德貴乎明大臣施設浸異厥初  
凡建意求言之人則以他事逐諫官言是稍直則以  
他職徙忠憤者指為不靖切直者目曰沽名眾怨所  
萃則相繼超升物論所歸則以次疏外某人之遷是

嘗重人罪以快同列之私忿者某人之擢是嘗援古  
事以文通日之天變者直節重望以私嫌而久棄老  
姦宿臧以巧請而牽復使大臣果能杜倖門塞邪徑  
則舉錯當而人心服臣故曰大臣之心貴乎公臺諫  
平居未嘗立異遇事不敢盡言有如金人再通最關  
國體近而侍從下至生徒莫不力爭冀禪廟算獨於  
言責不出一辭輦轂之下乾沒巨萬莫之誰何州縣  
之間罪毫髮抵以塞責大臣所欲為之事則遂之所  
不右之人則排之仁宗時有宰相奉行臺諫風旨之  
機今乃有臺諫不敢違中書之誚豈祖宗設官之初

意哉臣故曰臺諫之言貴乎直三者機枯所繫願陛下幡然悔悟昭明德以照臨百官大臣臺諫亦宜公心直節以副望我之意指陳蔽視事前疏尤剴切焉密遂請罷歸在告日擢太府丞不拜出知南康軍詣史彌遠別彌遠曰子言甚切當第愚昧不能行殊有愧耳至官歲大侵奏蠲其賦十之九會流民群集密就役之蔡江隄而給其食時造化白鹿洞與諸生討論改知南劔州時大旱疫蠲逋賦十數萬且弛新輸三之一躬率僚吏持錢粟藥餌戶給之創延平書院倣白鹿洞之規知漳州未行聞寧宗崩嗚咽累日亡

何請致仕寶慶二年提點廣東刑獄章復三上乞不就直秘閣主管崇禧觀密拜祠命而辭職各卒進職一等致仕三學諸生以起密為請而沒已閱月矣初密之在朝也寺丞丁焞往使金密歎曰世讎未復何以好為餞詩有百年中國豈無人之句後數年聞關外不請以書抵焞曰蜀口去關外雖遠實如一身近事可寒心皆士大夫之罪豈非賄道不絕之故耶焞服其言密天性剛毅信道猶篤嘗為朱墨銘謂朱屬陽墨屬陰以驗理欲分寸之多寡自言居官必如顏真卿居家必如陶潛而深愛諸葛亮身死家無餘財



庫無餘帛庶乎能蹈其語者端平初殿中侍御史王  
遂首言密事先帝有論諫之直而不及俟聖化之更  
宜褒其身後以勸天下之為臣者帝為感動詔贈直  
龍圖閣所著書有論語注義問答春秋三傳抄讀通  
鑑綱目唐史贅疣之藁數十卷藏于家

墓誌銘

闕

蔡撰

遺事

計十一條

有傳師復監簿輪對之章見之者三復敬歎使臣子  
之鯁切皆如此國其有不興乎煩為致意甚恨相識

之晚也

黃勉齋與潘謙之書

得真景元書嗜學之志甚至得陳師復書亦然此二

公者異日所就又當卓然真護法大神也先師沒今

賴有此耳可喜可喜師復以為李貫之立祠刊其詩

勉齋與李敬子書

南康陳守冒懷坦然無一毫私欲之累於

學問雖未甚加功然其資其志不可及也

勉齋與胡伯量書

向來同學之士今凋零殆盡閩中則潘謙之柄楊志

仁復

林正卿

學林子武

變李守約

閩李公晦

方江西

則甘吉父

節黃去私

張元德

洽江東則李敬子

燔

胡伯量

蔡元思

齡浙中則葉味道

賴潘子喜

時黃

子洪士毅大約不過此數人而已年來得尊兄并大府

陳寺丞相與接續尤覺此道之不孤若且得留東南數

年吾道之大幸也勉齋與李道傳書

人心天意只是一事今諸賢皆引去則失人心多矣

如李敬子熾劉平國李貫之傳陳師復豈可不力

言之朝乞加擢用以安人心以順天意勉齋與李珪制置今見宋

史勉齋黃榦不就除命入廬山訪其友李熾陳密相

與盤旋玉淵三峽間俛仰其師舊跡宋史榦本傳

李熾自謂居閑無以報國乃薦崔與之魏了翁其德

秀陳密鄭寅楊長儒丁黻葉罕龔維藩徐僑劉宰洪

咨夔于朝

宋史燾本傳

癸未夏過劔津遊道南書院見舊士友云去夏復齋

先生於此寫孝經一書并文公刊誤三千餘字或以

為勞復齋曰石經非思陵宸翰乎於學者何勞

方大瑞遺文

端平元年正月詔黃榦李燾李道傳陳宓樓昉徐誼

胡夢昱皆昵於權姦而各行其志沒齒無怨其賜謚

復官優贈存恤仍各錄用其子以旌忠義

理宗本紀

恩昔吾為元老大臣則有若正獻陳公正簡葉公

莊敏龔公相業光明宗社嘉賴為耆師鉅儒則有若

艾軒林公湘鄉夾漈二鄭公與近世復齋陳公或勲

業不競或肥遯自高或急流勇退皆得以並祠學官  
清風凜凜百世可仰

王蓮脩  
學記

### 仰止堂記

黃幹

仰止堂者丞相正獻陳公舊第之東偏晦庵文公朱  
先生嘗館焉文公樂其道而忘人之勢不遠千里而  
勤館人正獻公樂道而忘勢折輩行館而與之友二  
公之在此堂道相與也堂之面其山曰壺公峻拔端  
重若正人端士翔拱而進也文公之館於此正獻公  
之子皆樞衣焉太守丞寺密長而益嗜學思而文公  
不得見登其堂望其山如見其人焉取高山仰止之

義以名之既與朋友講習於其中而屬榦為之記聖  
賢之生斯世盛德至善血氣之屬莫不尊親者豈自  
外至哉秉彝好德良心之不自己也學者之於聖賢  
思其居處而起敬焉豈特聞風而悅之哉尊德樂道  
志於學者之不能已也寺丞之名此當可謂良心之  
發而能志於學者矣抑因是而有感焉道原於天聖  
賢體天立道而示諸人若喬嶽然可望而登也人皆  
仰之然無目者不見資稟累之也逐獸者不見物欲  
昏之也指一草木而謂之山見之偏且小者也有見  
矣趨而下焉舍喬而入齒也既趨矣峻則止焉半途

而遂廢也此豈其無人心而不知學哉心不充學不力也今之學者有不蹈此者乎吾惧斯道之日晦也誠能居敬以立其本窮理以致其知力行以踐其實體高山景行一仰一行相為先後之意循序而漸進自強而不息始見其彌高終見其卓爾羹牆與立無非道也則於斯堂之義庶乎無愧矣豈有他哉充其好德之心厲其好學之志也寺丞立朝臨政能任道者也故推其所感者以勉之且示同志便有警也

復陳師復監簿

頃於諸先令兄多雅故獨以未及參議為恨三四年

來每得謙之兄書未嘗不言篤志好學推己及物之  
盛美深切歎服然亦不敢遽以姓名自通於隸人近  
者又復拜觀應詔之章懇切簡直皆人所難言數十  
年所未見其為向慕又不但前日所聞於謙之兄者  
而已繼承台翰之賜捧讀不勝皇竦自顧哀暮何足  
以當勞問之厚榦少不自量喜從師友游竊有志於  
聖賢之學中年拏累猥衆偶得一官仰祿為活一試  
吏講習遂廢重以先師棄諸生朋友解散蓋不侍七  
十子之歿而大義已乖矣日夕惕懼如負芒刺忽聞  
執事志道之篤立行之高乃如此喜躍不能自勝想



先師九原之下亦當為之擊節喜吾道之有傳也朝廷之事既有如諸賢之所論奏而外之所恃以為人物者亦多不可曉解矣所以降灾者方數十里之旱今之所以救灾者又皆具之中原蕩析既不可支而邊陲守禦亦殊未有可恃之策腹心之疾未愈則耳目百體無往而非病良醫之藥既卻而不用則事無可為者矣榦衰晚不才分甘投棄昨上香火之請本無他意只是年老不堪從官未蒙俞允姑且安之適趙興國持倉節於榦為姻黨至親不容不引嫌而去自是可以退安田野以卒舊業以終餘年矣

復陳師復寺丞

寺丞天資高明閑居益加涵養吾道之幸也。竊不能  
安貧冒昧一出信道不篤徒深悔懼。抵此五日即聞  
浮光之警人情未相諳悉。無以為策。今虜騎已退上  
下相安稍可措置。最苦是郡無城壁。便即興工創築  
度費五十六萬券。郡中亦有一二十萬。皆是前政椿  
積已申朝廷之錢。亦不暇問。只得支用。郡民便之捐  
施竹木工役夫米者紛然。此亦不容但已也。亦請於  
朝乞四十萬券。未必應副。亦無可奈何。只得旋措置  
也。秋冬間了得此一役。便可丐歸矣。虜騎之來亦不

過數千人此以數千人與之戰初亦小勝已而大合  
殺傷相當有貪功輕進者遂為所敗吾之所失遂多  
度亦不敢以實聞也諸賢施行大抵未有起人意者  
到此一月以六書達制師與議邊事皆未得報豈以  
其切直而惡之耶抑以倉皇忙迫而未暇也今只得  
自做家計脩城壁造器械排保五日夜與諸色譟裕  
民之政漕臺欲運合肥米至安豐相去二百里耳却  
來起安慶四萬夫安慶至合肥已是四百里捨近取  
遠人情皇皇只得力拒之幸而得免便覺百姓有歡  
舞之狀矣他事皆可闊畧有敢害民者必痛治之如

此亦稍可支吾但大勢可慮恐非一木所能支也季  
貫之尚留九江亦屢得書此等人皆引去物為之奈  
何

春初拜狀正切尊仰祝兄來承台翰之賜謙之兄繼  
至又得熟閑為況之祥至以感尉賑濟區畫甚力人  
賴全活甚善郡政一新又何以風厲薄俗更人知儒  
者誠不負於斯世也韓衰老念固及此今邊事復動  
亦不敢請歸矣虜犯浮光往來甚亟城雖未可破而  
四出抄掠生齒塗炭當何如也此間土城雖已圓脩  
但未包砌馬備面未未為可守但既有城壁亦只得

效死守之勿去時俗皆以為丙午辛巳丙寅虜之犯  
淮皆不能久故士夫之愚者亦全不以為意軍器全  
無一什士卒千人多是老弱皆須旋行措置去歲用  
意版築故此等事皆有所不暇及今亦一一未理輒  
有少稟此間軍器最是弓箭更無一具可怪之甚偶  
見詹簿說使郡弓箭甚多且箭材彼地產所出妄意  
欲就借箭萬枝少亦須借五千見箭却借五千箭材  
角弓得四五十張却便一面製造以補還仍示及價  
直便當納還儻賜軫念一郡均受鄰邦之賜若非是  
勢忽迫亦不敢相撓也已今此人費錢就彼顧人擔

擎以至望至望

承聞開府未幾豈弟仁恤之譽已洋洋於田里當翰  
黻之餘得賢者振恤之康廬之民何其幸耶但不知  
朝廷上司肯以米相助否莫若且急遣二三精敏官  
屬散行諸縣勸諸諭戶籍其有餘之粟以備賑難須  
是異日實可以及百姓音但為虛數則無益也同官間  
難得人寄居亦恐多私不若取之故舊中為佳也若  
李敬子肯相助則決不至有他也米價亦要平而有  
常每見所在豐年米價十錢至凶年出糶官米却只  
糶價五錢如此皆非是官物有限只得照常年例方

是或云凶年錢雖得是果然也却不思天灾流行百姓亦須大家喫受常年喫一升米今且喫半升此豈得已哉又賑濟不如平糶官司錢物既有限細民當此饑歲亦當倍竭其力以度凶危豈可誘之使偷情是非所以愛之也又濟糶不可分口數徒見瑣碎只是每家每日三升若一口者亦糶三升彼自能多寡相通融大抵舉大事者最怕叢挫也賑糶之法當論旬不論月且如每日糶三升每旬糶三斗或以一日而糶三斗或三兩次糶三斗從其便可也如此則人免伺候之勞切不可慕納流移之名其後難繼乎人

情偷情若開此門必至失業乃所以害之也南豐述  
趙清獻之事以為仍告以去其家者勿給此正所以  
絕其流移之路若欲往他處就食者則薄給其路費  
可也亦不可多多則既去復來亦難繼也愚見如此  
未知是否不敢不以告也幹此間城壁已就近又砌  
畢五門亦屹然可觀兵籍最少通老弱不過千人見  
於城內空地空地架屋千間為壯士營募民之壯健  
願居者給與之不收其餽金且先為辦床榻之屬以  
誘之官為之約無他役但使之家守丈五之城治其  
蕪穢使不為城之害有警則皆守城之兵也仍造挈



千張而家給之使之無事則閱習亦一助也近郊二  
十里保伍亦隸之郡擇其強壯者籍之有急亦可驅  
以守城如此二三千兵亦不難辦也燒一磚一事擇  
浮屠之捐輸者二十人主之應管內有僧寺闕住持  
者便給帖與之住持以償其勞如此則三四百萬磚  
亦不難辦來歲夏末此事可畢矣故山之興甚濃非  
敢為偽年事至此戲衫亦不宜久着也忽有制幕幕  
之命此事久矣諸公甚忌其來李公頗費唇舌省割  
下只得力辭不可以來歲城壁既就必趨使供職却  
旋求去走康廬以求教誨有日矣虜之弱甚矣不待

間諜而可知也諸賢度德量力不敢便為進取之計此其為宗社謀至矣然將為宗社無疆之計臣子要當致無疆之思今進取者既失之孟浪持重者又失之偷安不知事終安歸耶日引月長吾國日困以彼之憤激敵吾之偷惰未知鹿死誰手也況新冠方強羣盜蠭起吾所當慮非但一端也今邊郵事息正造物者遺我以閒暇之日使之明其政刑登崇良俊以共起事功

政恐反因以驕縱而日益顛倒耳每一念之令人流涕要之但當歸死故山不至徒在世間為人所嫉惡也安得一見抒胸中之憤

問耶

以廬阜之崔嵬與彭蠡之洶湧臨之以一代之偉人  
人物山川相與酬酢一郡生齒游泳於春風和氣中  
計其歡謠已洋洋於田野間矣甚盛甚盛輟抵此已  
逾半年自覺初謀已掘到此別無出場只得為築城  
鑿池與民為效死勿去之出策方其度工之初人無  
不驚且駭者幸而天相人扶未及半年事已就緒目  
今一意包砌歲前五門并三斗門亦可訖事便有啓  
閤雖大敵之至未可保而小小姦雄亦望風退聽矣  
身守一郡只得汲汲為一郡計外此皆非所敢矣如

國家如天之福虜至輒敗衄而去是以至今隆冬不敢深入此兩日方聞淮北洶洶大率皆是相恐嚇之意兵來不除道也天遣我以閒暇之日而諸公視之悠悠恬不加意要其胷中無識見無古今既不曉利害之實而又日夜拱手以聽命於人大固助之我固拒之謂之何哉南康朋友甚盛想聞賢守之至必有盡簪之樂榦亦以老且病告廟堂丐骸骨若遂雅志當得承教於白鹿臥龍之間矣

榦自前月來愈覺多事初令其往黃州提督關隘次又令往光州撫諭將士及至將行又令且赴制司稟

議凡此皆非所長只是緩急無人承當且胡亂拖出不知平日拔擢貴顯者又要作何用耶自去年四月以後虜騎既退全不做分毫事業及至事到目前方且旋荒虜固弱甚然驅中原之百姓盡括其家貲帥以渡淮使之抄掠以取償於我浮光信陽數百里之地殺人如麻室廬焚燬至今未退棗陽被圍已四十日尚未解其勢危甚盱眙既自取敗衄又招侮今又聞安豐亦已據確<sup>安</sup>丘矣為之奈何全看天意如何若人謀無一足恃者慶城壁未包砌軍籍亦寡弱器械未備將何以守若歷陽則尤當風寒之衝已力丐

免矣制司稟議之命甚久不

以一木不謂之愚可乎此計以決慨然相捨則上無以答朝廷之善舒民之望二者榮繫於心耳尚冀其決幸其五事亦多是文具此却亦畧改數處未知是否更幸詳之二君亦更相度事力果欲遣人却書也

韓讀書愛日之意甚切而精力不逮每切為慮新歲已登七十矣來曰若無多也朋友紛紛不為無人氣力足以任重者誠不易得故所望於左右者忽不自知其拳拳也靜處下工誠為長策然居敬集義博文

約禮皆不可廢朋友切磨固欲觀而善然講皆一事  
尤為至戚切湏將聖賢言語逐一研究不可以為非  
切已若不自此用功則義理不明生出無限病痛李  
貫之全是就講學上用功晚年大節光明如此讀書  
豈可忽哉留丞相晚年歸來日課先生詩傳朱先生  
每對人常輒歎服之蓋捨此實是無進益處也不知  
高明以為然否軫昨日得相識錄示小報知已被予  
祠之命乃十二月十七日旨揮今日邸吏發報狀尤  
分明此雖父兄為子弟謀無以易此遂使衰晚得免  
無廉恥之罪君父之恩大矣若得省劄早下不復以



家事關念則自今以往無非安作讀書之日矣別紙  
寵貺仰企愛予之厚恐其匱乏無以全其守也若祠  
祿不下亦只得判作餓死年來却見得此事稍分明  
死常事耳朋友之愧不敢辭私居辦此亦令人不能  
安也

與陳師復寺丞

陳淳

淳去載在都城為朝士輩相留講貫區區在都城之  
久頗覺兩浙間年來象山之學甚旺由其門人有楊  
袁貴顯據要津唱之不讀書不窮理專做打坐工夫  
求形體之運動知覺者以為妙訣大抵全用禪家宗

旨而外面又却假託聖人之言牽就釋意以文蓋之  
實與孔孟殊宗與周程立敵慈湖纔見伊川語便怒  
形於色朋徒至私相尊號其祖師以為真有得乎堯  
舜孔孟千載不傳之正統每言昌之不少作士夫晚  
學見不破多為風靡而嚴陵有詹喻輩護法此風尤  
熾後生有志者多落在其中其或讀書却讀語孟精  
義而不肯讀文公章句或問讀河南遺書而不肯讀  
近思錄讀周子通書而不肯讀太極圖而通書又只  
讀白本而不肯讀文公解本平時類亦以道學自標  
榜時官里俗多所推重前後無一人看得破自淳到

都來相訪議論絕不相入凡朝所與講磨者只是在學相業諸生雖識趣凡陋而至向未離聖門要義每極口為之明白剖析旬日後大小生徒多所感發也歆慕以為平生所未聞邦人至是始釋然知邪正二路之由分而異端曲賊證暴露使儒容學墨行盜名於一方者不復得以遁其情亦接得後進三四輩專心一志為可望有以慰鄭侯拳拳囑望之意亦自慚以為不枉如南康乃瀘溪晦翁二儒宗宦游之邦流風遺躅儼然如在而豪雋遊紫陽之門者亦多然其地隣江西則象山則風聲氣習亦不無薰染於簪纓

紳韋布之間為吾徒者時或有出入焉真是真非無  
復能辨而天理人欲恐或混為一區則發揚先儒道  
德之化主盟斯文使邦人風動響應粹然一於聖門  
實學之趨而絕無復有詖謬邪遁之流者非吾賢使  
君其誰歸想下車先務深所加意而英才美質有依  
賴焉不審白鹿洞中人物竟如何竟如何有真篤志  
不雜可取者否又聞前政遭論以聚斂之故則閭閻  
不無赤立之憂仁人君子至此必深為之動心而哀  
痛焉于斯時也極力撫摩朝夕正不容緩況令之世  
橫歛毒賦隱為民病如久年錮疾赤子不能言有司

不敢言者在在有之惟仁者為能勇於為民除去而不容其留或州閭之間所同病者最是強梗姦慝之民專飾虛詞健訟以撓吾善良惟義者為能深譬其情狀而痛為之懲艾或長年善閉之自訟齊使之無復逞其瓜牙庶乎吾民有可安生樂業之望矣

荅陳寺丞師復二

伏承誨示讀書精誠靜三者之說是非切已用功體察何以及此但來說太約不見得主意之果為如何且書之所謂精者不知如何其精也精者乃純粹至極而無以加之謂如致知而至於知至則是致知之

精格物而至於格物則是格物之精也在讀書言則只是研窮其理見得真是真非端端的不可移易云爾如一句以為如此又為如彼則是一句之不精矣如一章既達其辭而未達其蘊則是一章之不精矣程子謂論語有讀了後全無事者是全未有一字之得而草率不精之故也有得一兩句喜者是已入得一線路子開明是一兩句之精也有知好之者是已覺其中有趣味之可嗜而於書之大義漸精也有直不知手之舞足之蹈者是深有悟夫趣味之無窮而全書之已精也然精亦豈容易可至

哉是用多少工夫積累而然如顏子博文約禮必至  
於所卓立爾然後為精如孔子志學必至於不惑知  
命然後為精然此又以見道全體言之非精於一書  
之謂也今謂誠則精者不知何如其誠誠者蓋真寔  
無妄之謂之以天命本然言者若誠者天之道是也  
有以人事當然言者若誠之者人之道是也有以理  
言者若誠者物之終始是也有以心言者若不誠無  
物是也有以德言者若唯天下至誠為能盡其性是  
也有以用功言者若君子誠之為貴是也不知來意  
所主是以天言邪人言邪以理言邪心言邪以德

言邪用功言邪由誠而精者於誠後又如何而精邪  
謂靜則誠者不知如何其靜靜與動對靜是無時事  
動是應事時如寂然不動者是心之未發而其靜也  
感而遂通天下之故者是心之已發而其動也人生  
而靜天之性也是未感物時心之所發渾是大理也  
感於物而動性之欲也是已感物時性之發而為情  
也喜怒哀樂未發謂之中則其靜也發而皆中節謂  
之和則其動也靜者其體而動者其用也心不能偏  
於靜必有動時亦不能偏於動必有復靜時一動一  
靜循環無端而誠則徹表裏一終始而貫動靜者也



今以靜言誠偏就靜一邊為主則其接物而動時非所謂誠乎由靜而誠者於靜後又如何而誠乎恐不免墮於釋氏之失否則由靜而誠由誠而精其中果有血脉相關處與否果通而無礙與否想親下工夫必深熟曲折若只是揀數箇好字立箇標榜不暇計其中意旨曲折淺深可否使之明明瑩瑩却成疎漏又大糊塗大欠缺無實下手用工夫處文公平日所深所喜於諸生之有此類者正為是也所謂寡慾為本之說信然明白無可疑者特講訂相忘不覺縷縷未審雅意為何

答陳寺丞師復三

久不奉清表忽承惠翰披挹謙光何勝感悚勉齋之  
逝可傷終始親密師門傳本末之備者惟慈一人今  
其已矣誰復可依靠邪為之累日嘆息吾黨凋零斯  
道誠為孤立賢契有志之篤如此止有賴其光大之  
功所論讀書持敬一時不可輟可謂得學之要領矣  
蓋須如此用功方有新之望大抵持敬乃實動靜微  
顯微之功所以存主此心而森萬理之會爾讀書又  
無他道特不過講明此理之端的者真知其為是非  
之者真知其為非如此而已是二端者固相須如相

發然非切實着工夫齊頭並進亦不足以得其趣味也區區每病孤陋惟英明時有以發之幸甚勉齊論語增釋果蒙肯來發藥尤千萬之幸也

與陳表夫寺丞

表夫名圭

方大琮

大琮震仕江右時先正復齊龍圖移書於留憲使云平生不輕薦人正恐不惟得罪於人亦將得罪於天若方大琮則所熟加也其薦語甚力每念受復齋之知立朝竊有慕焉西山登對於訪落初首薦復齋宜在言地大琮亦嘗請問所以不出之由則答以豈不願仕事明主實以與當國者不合耳當俟他日時在

坐聞此語者兩三人暨氷山見睨天目清明使復齋  
而在將必爲時出出必有合合必有可觀者既不獲  
居西山所薦之地徒使去非王遂極力上褒表之請  
豈非千載遺恨哉近聞奏篇剴切若蒙錄示以慰拳  
拳尤幸

祭陳師復寺丞文

門人劉克莊

於乎律已伯夷之情待人太丘之廣臨民子產之愛  
立朝汲黯之懋若不能言而盡該貫古今之義理若  
不勝衣而有負荷天下之力量拂袖歸來朝野想望  
踐聖賢之槩燧化州邑以庶讓訓子弟於家庭殷秀

孝於里巷有通體之誠實無一毫之矯妄有終身之  
戰兢無跬步之急放善類以為主宗學者以為師匠  
皆謂其享彭聃之高年踵韓呂之世相夫何一夕遽  
得微恙方親朋來問覺神氣之猶王曰大丈夫臨危  
噤國事之其吐安能與兒女呶呶涕泣於衽席之上  
嗚乎斯人弘毅宗壯嗜道義如膾炙輕名利如糞壤  
使其耆老不過菜羹脫粟味臞儒之樂深衣大帶為  
後生之唱然猶推之暴而奪之速豈非蒼生之無祿  
斯文之將喪克莊少小親炙平生敬仰非止涉其藩  
籬而深造其函大理無微而不諄事有疑而必訪忽

山顙而致萎將安放而安仰陳寢門之薄酹庶魂識  
之來享放乎哀哉

跋復齋為王寶之書四時箴

真德秀

余在星沙以庶仁公勤四事勉僚屬王寶之邁作此  
箴遺余嘗揭之幕府之壁與同僚共警焉今復齋陳  
公師復又為大書此本寶之之箴明厲峻切讀者已  
知悚畏復齋之字森嚴清勁見者便如端人正士之  
在前當凜凜然興敬也

跋陳復齋詩卷

真德秀

德秀已丑春嘗為自箴曰學未若師邛之遽量未若南海之寬制行劣於莆田之懿居貧愧於義烏之安莆田者指予師復而言也德秀與復齋平生故人而每嘆其不可及後其亡三年乃見所與友人劉君詩卷蓋於堅臥不出浮言易洩之際而自處泰然佳時良夜邀朋命侶極登覽賦咏之娛回視德秀昔負皐時掩關僊臥喘之約不敢少自放者相去遠矣於是益嘆其不可及而痛其不可復見也劉君於復齋為德友故其游從密廣和數云

臨邛魏了翁南海崔與之義烏徐僑

請諸友續講東湖劄

黃 績

績曩受學陳復齋潘瓜山二先生于仰止堂詩僅十  
有餘人朔有集旬有講著作規約二先生歿諸生自  
築祠于東湖蒙繡使楊使君撥祠田為春秋二祀及  
友朋旬朔聚會慶弔之 費蓋已三十年今同社之  
友凋落過半績與柯學錄思過阮教諭宜孫幸無恙  
然歲月各近者希或衰或病倘綫脉不續則此祠荆  
棘矣於是私相與謀鄉邦稱為善士能讀我文公之  
書者如顧任遠仁翁顧東老潛夫黃鏞器之鄭與言  
直卿林寅公伯良林夢協若山方至善夫林應成汝



大陳端然仲弼林桂高高父鄭獻翁帝臣方哲希甫  
林合若水黃德星炳仲黃強學能仲一十五人欲延  
至東湖照仰止之規約輸流誦讀俾同社之子第各  
聽講焉誦罷蔬飯而已庶演迤將墜之緒以扶植二  
先生鳴道之初心竊念東岡寺正先生宗主斯文泝  
祖父之源流揖朱張之風味直所謂而聞知者欲借  
鼎呂之言興起後學績遜執此以請諸友無不樂從  
實拜先生以善及人之賜軍學學正黃績請

書黃學正請士友東湖績講後

古之教者黨有庠術有序國有學而鄉校之設於傳

有之東湖之祠蓋尊先師以表儒學之宗淑後人以  
為講學之地亦古之遺意也復齊瓜山二先生師承  
考亭其所以綱繹而誦明之者見有仰止堂規約先  
生沒而祠之宜也先君登二先生之門祠之始創實  
與焉至曩侍先君如簫辨香祠下冠屨雲集再至三  
再焉則昔之從游者無幾矣冒來二郡首展祠敬先  
及典刑惟黃學正柯學錄在慨前脩之益遠覩成規  
之尚存暇日因學正與言祠不可廢相與維持者其  
在人乎學正周玉郡侯徐東岡於是延請士友預師  
集者十有五人月有會講習其間續仰止舊約以溫

二先生之微言蒲之東湖亦遊三山之鰲峯祠父各  
尊其師而祠成或謂鰲峯規模太寬而湖加密然斯  
則隨寓而隨見也致知力行之方謹思明辨之目更  
相與訂正油然有得將進而為復齋之名節議論退  
而為瓜山之學問操脩豈無所自來哉學正俾書其  
後不敢辭景定甲子臘月上泮鄭至記

送陳師復守延平

蔡 沉

又把州麾去多應避盛名流民歸舊業儉歲有歡聲  
學自延平出人如劔水清敢言輕去國殊未識先生  
戶口饑荒後循良撫字初於民猶子姓凡事本詩書

便欲平灘梗今無獻羨餘隨州書滿架學道不如愚

又

劉克莊

詔免延英對輕裝見吏民極知忙救旱豈是急頒春  
邑為搜空壤州因獻羨貧此行休戚繫未敢賀朱輪  
因戴復古行寄復齋先生 前人

倉部當今第一流艱難有詔起分憂城色如卯吏群  
盜膽大於身蔽上游應是孔明清治事豈無子美可  
參謀君行必上轅門謁為說披蓑弄釣舟

時復齋守  
延平

挽復齋先生

高九萬

號菊圃

封章字少納忠多袖數前程無柰何但得中天行日

月不愁平地起風波臺官論罪終投筆山賊聞名亦  
倒戈惆悵脊梁如鐵硬天胡忽使悶山阿  
憂世心勞鬢已斑笑頻還與世相關秋霜列日君臣  
際和氣春風母子間學道期傳千載緒獻言先辨一  
生開堂堂仰止人何在只有名如不動山

又

劉克莊

已奏囊封墨尚新又攜袖疏榻前陳小臣憂國言無  
隱先帝如天笑不嗔闕下舉幡空太學路傍卧轍幾  
遺民愚儒未解天公意偏壽他人天此人  
歲晚滄州築草堂却將逢掖換軒裳市朝共嘆鳳高

翦世俗或疑麟不祥童子舉扶猶慷慨門人要經各  
淒涼衰殘無復相鏘切遺墨常留八按傍

訪復齋陳寺丞於私第

戴復古

字式之天台  
號石屏

以時為出處真有古人風奉母易為孝事君難盡忠  
閒居非傲世直氣尚摩空語及朝廷字乾坤萬感中